

大方廣佛華嚴經普賢行願品別行疏鈔卷第三

唐圭峯草堂寺沙門宗密隨疏鈔

〔鈔〕上來第二正釋疏文四分中。一總敘文意。二歸敬請加。三開章釋文。四慶讚回向。初總敘文意已竟。自下第二廣釋歸敬請加。

〔疏〕稽首歸依眞法界。光明徧照諸如來。普賢文殊海會尊。願得眞資贊玄妙。

〔鈔〕第二歸敬請加。於中分二。初三句是歸敬。後一句請加。初中又二。初有四字。是能歸三業。稽首歸依。後有一十七字。卽所歸三寶眞法界下。今初疏

稽首歸依者稽者屈也至也首者頭也歸者向順之義依者憑託之意疏主欲擬製述先起三業虔恭敬仰屈已頭頂以至於地心冥佛境口誦詞句剖析心誠乞求加護也問何故最初歸敬三寶答略有七意一顯示吉祥故二發生信心故三令知恩德故四儀式應然故五表有承稟故六爲求加護故七隨順先聖故且初顯示吉祥者三寶功德第一吉祥故於最初先申歸敬欲令所製久久流通二利吉祥故先歸敬也成實論云三寶最吉祥故我經初說二發生信心故者欲令後人聞此教

典不起疑惑。生起信心。故於最初先歎三寶。令於三寶生順信已。方於正教不疑謗。故三令知恩德。故者。謂佛有說法恩。法有生解恩。僧有傳教恩。若無佛寶。卽無人說法。若無法寶。卽無由生解。若無僧寶。卽無人傳教。是以由佛說法。由法生解。由僧傳教。令得聽聞。由此三恩。方成慧悟。令知恩德。故疏先明四儀式。應然故者。世間臣子。凡有所爲。先白君父。方合儀式。三寶恩德。逾於君父。大師之心。何啻臣子。將欲發揚正教。先白三尊。儀式應然。故歸敬也。五表有承稟故者。欲顯所述。且非胸臆。皆

依聖教。盡有經典承稟三寶。所證所說。製成此疏。以誨後人。故於最初。先申歸敬。六爲求加護。故者。像季傳教。障難恆多。先敬三尊。上求加護。七隨順先聖。故者。西天聖眾。諸菩薩僧。造論釋經。皆先歸敬。順諸先聖。故敬三尊。敬意極多。不能繁述。釋此所歸三寶。分二。先標三寶義。後正銷疏文。今初三寶之義。佛法大綱。學者要知。不可不說。略以五門分別。一釋名。二出體。三建立。四次第。五問答分別。今初有二。初總名。後別名。總名者。三者數義。寶者。從喻爲名。依寶性論。有六義。一希有如世間金玉。

等世間難得。三寶亦爾。百千萬劫眾生難遇。二明
淨。如世間金玉體性明淨。三寶亦爾。離染無垢。所
以明淨。三勢力。如世金玉有威德勢力。三寶亦爾。
見道力用神通威力。四莊嚴。如世金玉莊嚴世間。
三寶亦爾。定慧莊嚴出世法故。五最上。如世金玉
於世最上。三寶亦爾。修出世道最尊最上。六不變。
如世金玉不可改易。百鍊不輕。久埋不生。三寶亦
爾。不爲世法之所改易。具此六義。故名爲寶。從數
及喻以爲名也。次別名者。謂佛法僧。梵云佛陀。此
翻覺者。佛地論云。於一切境能除二障。如睡夢覺。

如蓮華開。自覺覺他。覺行圓滿。名之爲佛。覺卽是佛。當體爲名。梵云達摩。此云法。卽教理行果。自性軟持。名之爲法。軟持卽法。當體爲名。梵云僧伽。此云和合眾。三乘聖人。理事二和。體無違諍。和合是用。眾卽是假和合之眾。依主得名。第二出體者。於中有二。先辯差別。後明體性。初文有三。一住持。二別相。三同體。皆可寶重。生福之田也。初住持者。佛謂形像。法謂教法。僧謂五眾也。二別相。三寶。依賢首大師五教。分五。一。小乘教。文三。佛法僧。一。佛寶。文三。以明。分五。一。小乘教。文三。佛。法。僧。一。佛寶。文三。初法身。卽五分。戒定慧解脫二。報身。卽丈六三。化。身是

身謂隨類化身是二法寶文四一教法謂聲教二理法謂生空理

三行法謂三十七品四念處四正勤四如意足五根五力七覺支八聖道四果法

謂擇滅三僧寶即四果二大乘始教亦三一佛寶

文三一法身謂清淨真如二報身謂自他二種受用三化身大

身千丈小化身丈六隨類化身二法寶文四一教法謂本質二理

法謂二空三行法謂六度四果法菩提三僧寶即

賢十三大乘終教亦三一佛寶文二一真身謂法身及

自受用二應身謂他受用及化身二法寶文四一教法唯心

二理法謂二空三行法謂六度四果法謂始覺三

僧寶謂三賢四大乘頓教但唯真性更無別法縱

善後了真戶乾少...

9

使強論亦不出一性亦三一佛寶。約覺二法寶。約

持三僧寶。約不五大乘圓教文三。一佛寶文二。一

融三世間十身。眾生世間器世二佛自具十身。提

願化力莊嚴威二法寶文四。一教法。謂別教二理

法。謂法界三行法。謂行布四果法。謂依正三僧寶。

謂海會三同體者自有三說。一就本性說。性自靈

覺佛也。性本寂滅法也。性上本有恆沙德用互不

相違亦不乖諍。一味清淨性體僧也。二就觀行說。

觀照佛也。照故離識。可以軌持法也。在觀則萬法

已圓念念自無乖諍僧也。三就融通說。世出世間

差別之法。盡託圓明大覺假現。一一無有自體。當體便是圓覺。則一切皆佛也。如鏡現像。像皆是鏡。所現之法。一一寂滅。雖寂滅而不壞相。性相不異。故一一相隨性而徧法界。性隨相而干差。盡未來際。性相無礙。究竟皆可軌持法也。既一一相隨性。無礙。則一入一切。一切入一。一包一切。一切包一。交參涉入。和合無違。凡聖一一皆然僧也。二明體性者有三。一住持三寶。佛寶。不論金玉圖繒塑畫等。並以四塵爲體。法寶。若紙素竹帛等。亦以四塵爲體。僧寶。若凡夫僧。卽以有漏五蘊爲體。若圖畫

僧亦以四塵爲體。此等住持皆令真實三寶勢力不斷名住持也。故淨名經云。紹隆三寶能使不絕。二別相三寶法身卽以無垢真如爲體。自受用身以實無漏五蘊爲體。他受用身以平等性智所現相分似無漏五蘊爲體。化身有三。若大化身以成所作智中所現微細色心相分似無漏五蘊爲體。小化身以成所作智中所現通麤及細色心相分似無漏五蘊爲體。若隨類化身以成所作智中所現唯麤色心相分似無漏五蘊爲體。若法寶有四。一教。謂名句文。二理。謂二空真如。三行。謂六度十

度萬行四果。謂菩提涅槃殊勝之果。此之四法。總爲法寶體。僧寶以三乘聖人無漏五蘊爲體。三同體三寶。通以眞如爲體。如有覺義名佛寶。如有軌持義名法寶。如有理和名僧寶。故涅槃經云。若能觀三寶常住同眞諦等也。又淨名經云。佛則是法。法卽是衆。是三寶皆無爲相。與虛空等。又寶積經云。正見法身。尙不見佛。何況形色。以空遠離。尙不見法。何況言說。以無爲法。尙不見僧。何況有和合衆也。三建立者有四。一翻邪三歸爲彼外宗。有三。一邪尊。二邪教。三邪人。翻彼三故。建立三寶歸依。

佛已寧捨身命終不歸依自在天等歸依法已寧捨身命終不歸依外道典籍歸依僧已寧捨身命終不歸依外道邪眾爲所翻有三故立三寶廣如優婆塞經說也二對根者爲上根人趣佛菩提說於佛寶爲中根人求自然智及因緣法而能入道說於法寶爲下根人依師受學理事不違方能入道說於僧寶三約喻者佛如良醫法如良藥僧寶如看病人四依因者一依如來爲因二依法爲因三依止我弟子爲因諸有情類要由三因得涅槃樂如十輪經說具上四義不增不減但說三寶

也。四辨次第者有三。一約功用次第。教化眾生無過於佛。故先明佛寶。由有佛故。說三乘法。故次明法寶。由有佛法。化三乘眾。故後明僧寶。二約修行次第。一切聖人以法爲本。先明法寶。由有法故。方有修行。次明僧寶。由有法僧。當得佛果。後明佛寶。三約勝劣次第。同體三寶中。法寶爲勝。故經云。諸佛所師。所謂法也。以法常故。諸佛亦常。故法寶勝也。別相三寶中。佛寶爲勝。故經偈云。天上天下無如佛。十方世界亦無比。世界所有我盡見。一切無有如佛者。故佛寶勝也。住持三寶中。僧寶爲勝。由

人能弘道。非道弘人。人在卽法在。人亡卽法亡。故僧寶勝也。五問答分別者。問前云三乘聖人皆是僧寶。聲聞眾多。可名爲僧。獨覺獨出。云何成僧。答緣覺有二。一獨覺。出無佛世。靜處思惟。卽能悟道。此旣無眾。闕於事和。但是行法。非僧寶也。二眾出。亦有無量大緣覺眾。具理事二和。所以成僧。今約眾出。故仁王經云。時有八百萬億大仙緣覺。非斷非常。四諦十二因緣皆悉成就也。問出家菩薩具。有二和。可名爲僧。在家菩薩。唯有理和。莫不成僧。答在家菩薩。雖無事和。而有理和。性無乖諍。卽得。

成僧不同聲聞要具二和也。問菩薩僧中有其幾人。答依仁王經瓔珞經說有四十二賢聖。所謂地前三賢。地上十聖。及等覺妙覺。如彼廣說。所以不取十信者。爲是凡位也。於四十二位中。四十一是僧寶妙覺一位。是佛寶所攝也。上來五段不同。略明三寶義竟。後別銷疏文者。疏真法界者。卽法寶也。攝法差別。但歸真界也。先標法者。諸佛之師故。疏光明徧照等者。佛寶也。梵語毘盧遮那。此云光明徧照。此就新梵語翻也。若準舊梵語翻。毘盧遮那。此云徧一切處。寂屬法身。盧舍那。此云光明徧。

照屬在報身。若準梵文。卽不如此。二種梵名。但新舊別。非分法報之異。故舊譯華嚴總名盧舍那。唐譯經中。皆曰毘盧遮那。卽三身十身通名。毘盧遮那也。今此中用。卽法報通稱。此最爲正。况此宗中。法報無異。同是一源。不同諸教。有爲無爲。別又據此大經。及一字頂輪王經。釋迦毘盧。及一切義成等。皆是異名。故知三身更無別稱。但是古德義說也。故知此中不錯用也。言光明徧照者。謂常寂光徧一切法。如鏡之明。像像皆徧也。諸如來者。主伴互收也。舉一爲主。一切皆伴。伴者不離主也。普賢

文殊海會尊者。僧寶也。二聖爲海會菩薩之尊也。又望能歸之人。卽指海會菩薩是我之尊也。後會通。二聖菩薩數過刹塵。名著在經者亦有數百。偏歸二聖者。良有所以。二聖本尊總爲三聖。託以表法。不徒然也。今依三聖圓融觀略顯二門。一相對明表。二相融顯圓。初中二聖爲因。遮那爲果。果超言相。且說二因。若悟二因玄微。則見果海深妙也。二聖略爲三對。一能信所信對。言能信所信。表是因中。謂普賢表所信法界。卽在纏如來藏。故理趣般若云。一切眾生皆如來藏。普賢菩薩自體徧故。

初會卽入藏身三昧者意在此也。文殊表能信之心。佛名經云。一切諸佛皆因文殊而發心故。善財始見發大心故。經云。出生一切菩薩無休息故。二解行對。普賢表所起萬行。上下經文。五周因果皆普賢行故。文殊卽能起之解。慈氏云。汝得見諸善友。聞菩薩行入解脫門。皆是文殊威神力故。又云。常爲一切菩薩師故。三理智對。普賢表所證法界。卽出纏如來藏。善財童子入其身故。一毛廣大卽無邊者。稱法性故。經云。普賢身相如虛空故。又見普賢卽得智波羅蜜者。明依理發智故。文殊表能

證大智本所事佛名不動智故常爲無量諸佛母
故諸經中說法多顯般若旨趣故善財再見文殊
後方見普賢者顯有智方能證理故是以古德銘
後文殊爲智照無二相也不現身者心境兩亡故
以文殊權實之智證普賢體用之理此之一門古
德親問三藏三藏言有經說未傳此方又此一門
亦表定慧理本寂故智卽慧故亦表體用普賢理
寂以爲心體文殊智照爲大用故二相融顯圓者
亦二先明二聖法門各自圓融後以二聖法門互
相圓融初中謂文殊必因於信方能成解有解無

信增邪見故。有信無解。長無明故。信解真正。方了本源。成其極智。反照不異初心。初發心時。便成正覺。又前方便之智。不離體故。後文殊名智。照無二相。照信不殊於智故。從無身相。以展右手。是以文殊三事融通隱隱。次普賢三事自相融者。理若無行。理終不顯。依體起行。行必稱體。由行證理。理無行外之理。由理顯行。行無理外之行。故隨所證理。行無不具足。一證一切證。故見普賢一毛所得法門。過前不可說不可說。倍又是卽體之用。故毛孔法門。緣起無盡。由是普賢三事。涉入重重也。二以

二聖法門互相融者。謂要因於信。方知法界信。若不信法界信。則爲邪故。能所不二。不信自心有如來藏。非菩薩故。次要籍於解。方能起行。稱解起行。行不異解。則解行不二。次以智是理用。理體成智。還照於理。智與理冥。方曰眞智。則理智無二。故經云。無有如外智能。證於如。亦無智外。如爲智所入。又法界寂然名止。寂而常照名觀。觀窮數極。妙合乎寂。則定慧不二。又卽體之用曰智。卽用之體曰理。卽體用無二。是以文殊三事融通隱隱。卽普賢三事涉入重重。此二不一不異。方名普賢帝網之

行。故普賢行品及上下經文廣顯事理圓融爲普
賢行。非獨事行名普賢也。亦如曼殊千鉢經云。爾
時眾中菩薩摩訶薩。一切有情同修行普賢曼殊
行願證入毘盧遮那如來十大慈佛心觀。亦表二
聖不異。問。旣二聖相融。何以不名文殊行耶。答。爲
攝智屬理。唯一眞法界。故舉一全收也。二遮那爲
果者。二聖法門旣融。則普賢因圓。離相絕言。沒同
果海。是曰毘盧遮那光明徧照。唯證相應故。法界
品末普賢菩薩後便偈讚佛德者。顯果相也。又品
初如來自入三昧現相無說。表所證絕言。而普賢

開發也。放光令悟。表能證絕言。而文殊開顯者。卽其意也。然上理智等並不離心。心佛眾生三無差別。若於心能了。則念念因圓。念念果滿。出現品云。菩薩應知自心。念念常有佛成正覺。故而卽一之異。不得外觀。勿滯言說。若能與此觀行相應。則觸目對境。常見三聖及十方諸佛菩薩。一卽一切故。心境無二故。依此修行。一生不剋。三生必圓也。第二請加者。疏願得冥資贊玄妙。可知。

〔疏〕將釋此經。五門分別。一教起因緣。二辨教宗旨。三翻譯傳授。四釋經名題。五隨文解釋。今初。夫法無言。

象非離言象離言象而倒惑執言象而迷真故聖人利見垂象設教必有由矣。

〔鈔〕第一教起因緣文分三段。一總標大意。二別釋十門。三總結指廣。今初也。一略標言。夫法無言象非離言象者。世有人言大象無形。大音希聲。絕慮亡言。自入真境。何用言教乎。疏意云。非言何以知無言。非象何以顯無象。大疏序云。雖空空絕跡。是無也。義天之星象粲然。不離象也。湛湛亡言。是亡言也。教海之波瀾浩汗。不離言也。諸經假言象顯無言象之文甚多。不能繁引。講者任其廣略。然言謂語言宣說。此卽

可知象者何也。象者像也。似也。謂取像似之物爲象。令見於眞理。周易有大象小象。以顯易道卽其事也。六龍象於陽德。變化無方。等佛說圓極之理。言之不及。多以喻況。皆此類也。若更深而論之。但以名言施設所顯之義。亦皆是象。不唯譬喻。以理畢竟言不及。故謂聞教生解。義相生時。亦是變影起故也。二反顯離言象。而倒惑執言象。而迷眞者。出取捨之過也。若眾生不遇善友。不聞聖教。曠劫長守倒見。終無自悟之期。故經云。譬如闇中寶。無燈不可見。佛法無人說。雖慧莫能了。執言象而迷。

眞者。謂但守於教。不求指歸。是執言也。縱求義理。但隨文生解。便爲眞實。不能以教爲明鏡。照見自心。不能以自心爲智燈。照經幽旨。是執象也。故經云。不能了自心。云何知正道。彼由顛倒慧。增長一切惡。如覽鏡時。本圖見面。便執見者爲實。豈不轉更成迷。故云執言象而迷眞。又疏主述華嚴刹海。變相讚云。執象或亡象。取空空外求。斯人鼓識浪。浩劫垂冥搜。卽象見無象。萬法歸毛頭。圓機覩一葉。法界知春秋。此卽一向別教圓宗。稍異前教。前則筌蹄定非魚兔。此乃言象卽同所詮。故一中見

多而無盡也。如聞谷聲無聲。卽知常應。見鏡像無像。卽知常現也。三順結。故聖人利見。至必有由矣。者。利見之言。借周易語。彼乾卦九五之爻。是仁君登位之象。文言九五。飛龍在天。利見大人。言飛龍在天者。大人造也。造者至也。至者。仁君至於位也。大人者。聖人也。聖人與天地合其德。與日月合其明。與四時合其序。與鬼神合其吉凶。此爲仁也。利見者。仁君至位。敘以聖德。能合異類。濟物理人。利無不普。蓋及異類。交感位極亨通。人臣之機會也。今明我佛聖人功圓德備。體無不周。智無不徧。四

心罔替唯務益生。有感必通。隨機誘化。知根利鈍。各稱所求。與利見而賜妙方。物受教而皆得度。則必無虛設也。故云聖人利見垂象設教。必有由矣。

〔疏〕因緣不同。略明十義。一法爾常規。二酬昔行願。三遂通物感。四明示真門。五開物性原。六宣說勝行。七令知位次。八顯果難思。九示其終歸。十廣利今後。

〔鈔〕第二因緣不同下。別釋十門。初列後釋。

〔疏〕此初法爾常規者。一切諸佛法爾皆現無盡身雲。說斯圓教故。

〔鈔〕釋中一法爾常規下。夫王道坦坦。千古同規。一

乘玄門。諸佛齊證。所證法性。法爾隨緣。緣性融通。法爾無盡。性雖一切齊應。今就說教爲門。既舉一全收。卽無盡矣。故佛法爾皆於無盡世界常轉無盡法輪。窮未來際。無有休息。斯則處以毛端。橫該法界。時以刹那。豎窮劫海。處則頓起。時則常起。不待別因。如萬籟之聲。非關撫擊。日月之照。不因川原。但隨見聞。說有初成。九會等別。諸慈悲者。於無盡中。略此留傳。令尋於此。見無邊法。如觀牖隙。見無際空。而此時處。卽同無盡也。

疏 二酬昔行願者。昔在因中。願周法界。依願起行。但

爲眾生。故今酬之。徧說徧益。

鈔二酬昔行願至徧益者。因旣願周乎法界。果必徧說酬之。如源遠則流長。根深則果茂。然因雖無量。無邊統唯此二。故下疏有車輪鳥翼之況。願周徧者。現相品云。毘盧遮那佛願力周法界。一切國土中。恆轉無上輪。行周徧者。主山神偈云。往修勝行。無有邊。今獲神通。亦無量。法門廣闊。如塵數。悉使眾生深悟喜。今說普賢行願。正是此因也。

疏三遂通物感者。謂佛證涅槃。寂然不動。機宜叩聖。感而遂通。若無感緣。佛說何益。

鈔三遂通物感至何益者。夫風息浪澄海現萬像。妄盡心寂佛應羣機。然澄海雖常能現無外器。而何現。佛智雖常能談無感緣。而何說。故大疏云。昔因法爾。雖能常徧。約可流傳。皆由機感。其猶上有白月下資。澄潭潭清影現。機感應生等。其寂然不動感。而遂通兩句。是周易之文。疏乃巧隨義勢。揀而用之。然其機感亦有二種。一通二別。通謂凡厥生靈。皆含佛智。無不被矣。別謂雖皆普被。機有優劣。故益有淺深。其猶一水。方圓任器。略分五種。一正爲。謂一乘圓機。宿世曾聞。今能悟解。造觀修行。

或便證入。二兼爲。謂聞雖未悟。而能信向。以成堅種。如食金剛。終竟不消。地獄天子。是此類也。三引爲。謂權教六度菩薩。執定行布之位。不信圓融之法。故十地中。借其次第行布之名。而誘引之。終令入實。如置藥乳中。乳能愈病。以性投相。而相自亡。四權爲。謂二乘既守自位。不能聞見。故諸菩薩權現聲聞。或示在座如聾如盲。彰其絕分。警餘忻樂。或示在道開悟。知可回心。五遠爲。謂外道闡提。聞雖生謗。墮於地獄。一熏耳識。功不唐捐。罪畢終令獲益。乃至成佛。如狂罵藥服之病除。如塗毒鼓聞

者皆死。以斯五類收無不盡。其通別機感具依此品廣疏也。

疏四明示真門者。眾生流轉總爲迷真。故示真門。令其返本。真原之要卽下所宗。

鈔四明示真門。至下所宗者。諸經就機權引本意。欲令歸真。若無此經稱性極談。究竟無所歸處。爲談真實。故說斯經。眾生流轉等者。大經云。眾生無始來生死久流轉。不了真如義。故諸佛興世。興世本欲示真門。故法華經云。如來唯爲一大事因緣。故出現於世等。卽下所宗者。第二辨宗旨中云。統

唯一眞法界乃至開爲理事法界無障礙法界也。
〔疏〕五開物性原者。良以眾生性含智海。識洞真空。但衣蔽明珠。室埋祕藏。要假開示。令其悟入。

〔鈔〕五開物性原。至今其悟入者。前雖明示眞門。尙未直指自心。若不就心中識悟。依何起於萬行。故大疏此段名開因性。如何開耶。出現品云。佛子。無一眾生而不具有如來智慧。但以妄想顛倒執著而不證得。凡夫妄想權小。執著顛倒通二。若離妄想。一切智自然智無礙智。則得現前。譬如大經卷。喻佛智慧。量等三千大千世界。智體無邊。廓周沙界。書寫三千大千世界中事。

一切皆盡

喻體上本有恆沙功德恆沙妙用

此大經卷雖復量等

大千世界而全住在一微塵中

喻佛智全在眾生身中圓滿具足

如一微塵

舉一眾生爲例

一切微塵皆亦如是時有一人

智慧明達

喻佛

具足成就清淨天眼見此經卷在微

塵內

天眼隔礙見色喻佛智隔煩惱見佛智也

於諸眾生無少利益

喻迷

時都不得其用與無不別

卽起方便破彼微塵

喻佛說法除障

出此大

經令諸眾生普得饒益

後合

佛子如來智慧亦復如

是無量無邊普能利益一切眾生

合書寫三千世界事

具足

在於眾生身中

合微塵也

但諸凡愚妄想執著不知不

覺不得利益爾時如來以無障礙清淨智眼普觀

何具有如來智慧愚癡迷惑不知不覺我當教以
聖道令其永離妄想於自身中得見如來廣大智
慧與佛無異故此云性含智海也識洞真空者幻
化妄識本來虛無故卽洞徹真空也故大疏云眾
生包性德而爲體攬智海以爲源但相變體殊情
生智隔今欲令知心合體達本情忘故談斯經以
爲顯示釋曰此則兼明眾生迷眞執妄之由也如
福德智慧相貌具足之人忽然夢見貧賤醜陋病
痛苦惱之身卽是相變不見本身卽體殊也執認云是我身

即情不信自身福德端正即智隔也故此有衣蔽明珠室埋祕藏等喻也

覺者警之令悟惡身便是好身即合體也覺即自然不

執惡身是亡情也故此云要假開示令其悟入大疏文

備又是利生之要故具引釋也言衣蔽明珠者法

華第四百弟子授記品中憍陳如等諸大聲聞

同時領解得記所說之喻經云譬如有人至親友

家醉酒而臥是時親友官事當行以無價寶珠繫

其衣裏與之而去其人醉臥都不覺知起已遊行

至於他國為求食故勤力求索甚大艱難若少有

所得便以為足於後親友會遇見之而作是言咄

哉丈夫。何爲衣食乃至如是。我昔欲令汝得安樂。五欲自恣。於某年日月以無價寶珠繫汝衣裏。今故現在。而汝不知。勤苦憂惱。以求自活。甚爲癡也。汝今可以此寶貿易所須。常可如意。無所乏短。然法合有二意。一約結緣說。則圓解爲珠。與說爲繫。煩惱昏暗。與醉何殊。微有解生。還同繫了。五道求樂。名曰艱難。證小涅槃。名爲得少。說法華會親友。再逢知見。旣開。猶如得寶。以因易果。萬德周圓。何異貧人所求皆遂。二約本性說。謂珠雖本具。繫乃有時。未知令知。乃名爲繫。雖聞未悟。猶如醉人。堅

種既成。還同已繫。未合本體。如在衣中。欣喜福田。名求衣食。加之調伏。乃是艱難。再遇本緣。如逢親友。既悟知見。猶如得寶。證入法界。德用無邊。卽無所乏短。昭然可見矣。言室埋祕藏者。卽如來藏經有九喻。皆喻佛智蘊在眾生。名如來藏。此當第五喻也。經云。譬如貧家。有珍寶藏。寶不能言。我在於此。既不自知。又無語者。不能開發。此珍寶藏。一切眾生亦復如是。如來知見大法寶藏。在其身內。不聞不知。耽惑五欲。輪轉生死。受苦無量。是故諸佛出興於世。爲開身內如來法藏。九喻中。餘八取意。

引之一蓮華萎變內有化佛結跏趺坐法合云我
觀眾生諸煩惱中有如來智雖在煩惱常無染污
也二蜜在巖樹羣蜂圍繞智者方便除蜂得蜜蜜
喻智慧蜂喻煩惱三粳米未離皮糲愚者輕棄智
者精之當爲御食四真金墮不淨處經歷多載真
金不壞五貧人宅中有珍寶藏卽上所引六如菴
蘿果內實不壞種之於地成大樹王合云如來智
慧在無明殼內如果在核內七有人持金像往於
他國途遇險難懼被劫奪弊物裹之令人不識此
人命終像棄曠野行人謂爲弊惡之物得天眼者

去弊得金。八有一女人。貧賤醜陋。眾人所惡而懷
貴子。當爲聖王。王四天下。女人不知。自爲下劣之
想。九鑄師鑄真金像。成已置地。外雖焦黑。內象不
變。開模晃耀。九喻一一法合也。下總校量功德云。
供養過去恆河沙佛。乃至造恆河沙七寶臺。高十
由旬。日月如是。乃至五十恆河沙七寶臺。供養恆
沙如來。不如有人樂喜菩提。受持此經。乃至一喻
所得功德。百分不及一。千分不及一。乃至算數譬
喻所不能及也。

疏六宣說勝行者。欲契真性。非行不階。故說普賢無

方勝行。

鈔六宣說勝行等者。既頓悟本心圓明。反傷多劫
流浪。故須修習勝行。令契本源。還源觀云。如大摩
尼寶體性明淨。久被塵空。而有鑛穢之垢。若人唯
念寶性。不以種種磨治。終不能發光現物。真性亦
爾。久被煩惱垢染。若人唯念真如。不以持戒定慧
種種熏修。終無淨用。故經云。不如說行。於佛菩提
則爲永離。又法句經言。雖誦千言。不行何益。不如
一聞勤修得益。爲明勝行。故說此經。然有二種。一
徧成諸行。二頓成諸行。且初者。謂次第淺深各各

差別於中又二。一行本。二行相。言行本者。謂菩提心。大經云。忘失菩提心。修諸善根。悉爲魔業。故二千行法。冠於最初。善財見諸善友。皆先陳已發表。是修行器故。然菩提心略有三種。一者心體。二者心相。三者心德。言心體者。廣有無量。海雲比丘說。有十心。要略唯三。一者直心。一向正念。眞如法故。卽是大智無所執著。二者深心。樂修一切諸善行。故謂發大願。卽四弘誓願等。三者大慈心。救護一切苦眾生故。則前二所作。亦爲眾生。故慈氏章云。菩提心爲燈。大悲心爲油。大願爲炷。光照法界。光

卽大智上解。心體竟言心相者。謂要無齊限。若約悲願。則盡度眾生。盡修諸行。經云。虛空界盡等也。若約正念眞如。則下無眾生可度。上無菩提可求。中無萬行可修。亦無眞如可念。故淨名云。當令此諸天子捨於分別菩提之見。菩提者。不可以身得。不可以心得。寂滅是菩提。滅諸相故等。卽斯意也。若融上三心。則度而無度。修而無修。故經云。若於一切智發生。回向心。見心無所生。當獲大名。稱言菩提心德者。依上發心。一念之德。過於虛空。諸佛共讚。多劫不盡。故彌伽反禮於初心。若白月之新。

吐海雲警其能發美青松之萌芽。不有凌雲之心。豈展昇天之翼。若無等佛之志。豈成妙覺之尊。是故經云。一切功德皆於最初菩提心中住。雖終始不殊。而先心難矣。發菩提心品及慈氏章中廣說其體相德。三不相捨離。猶如日輪體是珠寶。其相圓明德無不照。成熟苗稼。廓徹虛空。三無離理也。此是行本廣大妙門。將入行海。故先須發菩提心。發心品云。欲見十方一切佛。欲施無盡功德藏。欲滅眾生諸苦惱。宜應速發菩提心。二明行相。謂十度萬行。廣在經文。上來兩段。總是第一徧成諸行。

也。二頓成諸行者。一行卽一切行故。此復有二。一

約心觀。謂一念相應能頓具故。謂此心卽是佛智。

佛智卽是無念。無念心體。內外無著。施諸過自止

戒忍可諦理。忍也離身心相。進也寂然不動。禪也了見性

空。般若也善達有無。方便也進詣妙覺。願也是真修習。力也

決斷分明。智也十度具矣。餘行例然。故修一行成一

切行。二約性融。以修一行。故稱法性。性融攝。故令

此一行如性普收。無行不具。卽十玄門中諸行純

雜具德也。應云。不異理之一行。全攝理性時云云。然前徧成行布之

行。與此頓成圓融之行。二無障礙。以行布是教相

施設圓融是理性德用。相是性之相。故行布不礙
圓融。性是相之性。故圓融不礙行布。圓融不礙行
布。故一爲無量。行布不礙圓融。故無量爲一。無量
爲一。故融通隱隱。一爲無量。故涉入重重。故世親
以六相圓融上下之文非一也。

〔疏〕七令知位次者。行則頓修。位分因果。因有階降。果
無差別。因果圓融。是此行位。

〔鈔〕七令知位次等者。發意修習。念念在圓。行則頓修。有
成未成。言因言果。位分因果。未成之中。復以塵習厚薄。

業障淺深。根有利鈍。修有進怠。致令位次階降不

同若不知之。或叨濫上流。或得少爲足。

因階降也。學射之喻。

於此說之。言位分不同者。第二會說十信。三說十住。四說十行。五說十回向。六說十地。七會前一半

說等覺也。若習盡智圓冥同性海。故得果用無二無差。

果無差者。卽第七會。次三品說妙覺位也。然差與無差二亦無礙。因果

也。此下始明行布因果。與平等因果二亦無礙。然對行位亦有二種。一行

布位。初淺後深。諸位差別。二圓融位。一攝一切。一

切位滿。卽說成佛。一位之中。具攝諸位功德。妙嚴

文。信該果海。初發心時。便成正覺。梵行品。此二相

攝。例如行說。故第七會說妙覺竟後。有二品明平

等因果融前差別因果。總同無礙也。

疏八顯果難思者。既修勝行。必有所趣。頓證法界。成大菩提。得涅槃故。

鈔八顯果難思下。言難思者。華嚴所詮佛果。真應相卽分圓全收。凡聖渾融。因果該徹。十身一一無礙。十時念念徧周。十蓮華藏相圓明。十出現門法竒勝。諸教逐機。且說三身四智。此經稱性備談。十身威雄。若不讀華嚴經。不知佛富貴。爲欲顯斯果德。故說華嚴大經。十種因緣。皆應一一隨其本因。如此假爲問答之勢。然德雖無窮。統唯二種。一依報果。謂華藏世界海。以十不可說佛刹微塵數世。

界爲一世界種。十不可說佛刹微塵數世界種爲
華藏世界海也。二正報果。謂如來十身融三世間
爲十身也。此二無礙。以爲佛德。然依正渾融有六
句。序中已明。旣修已下者。若非稱性圓因。不成融
通滿果。若不頓證法界。非眞菩提涅槃。故云爾也。
疏九示其終歸者。終歸法界。若因若果。若境若心。一
以貫之法界究竟。

〔鈔〕九示其終歸。至究竟者。經云。平等眞法界。無佛
無眾生。但以相待義門。強名因果心境。今旣證窮
念絕。何果何因。因果心境一體無異。故經云。如心

佛亦爾。如佛眾生。然應知佛與心。是三無差別。如金作器。巧拙懸殊。一以貫之。唯金究竟。法界義。如下宗中說。從四至九。次第與大疏一向倒者。彼釋大部之意。順於根本頓宗。欲明從本起末。故法界居初。標云教本。此釋入不思議境界一品之意。順於修證次第。欲明趣入本源。故法界最後。標云終歸。今且略明此中次第生起之意。不能和會大部之疏。故云略明也。第一直明經宗。法爾常說。徧說二。云何以法爾常徧說耶。酬彼往昔周普之行願。故三云。說雖常徧。若就益物。須感應道交。故機投

卽說如潭清卽影現。鍼逢芥子。可於此說。此上通論教因未

據修入之次。故彼此疏同也。四躡三云。感應化物。已有諸經。何須說此。未示眞法。不能究竟解脫。故五云。雖聞眞法。如何令其悟入。爲開物性源。令知自心本有斯法。故六。心開卽行起。七。行有漸頓。須知次位。故八。位滿成佛。故九。證極契本。還歸法界。故。法界卽第四眞法也。故知發心畢竟二不別。普光重會。再見文殊。有餘力。則更於此說。下第十門。亦是通相結益。故此彼同。最後明者。流通相也。

疏十廣利今後者。聖人設教。祇在益生。現益當機。流

芳萬古矣。

鈔十廣利至萬古矣者。夫成佛說教起卽有始。用乃無終。雨滴滄溟與海俱竭。一言稱性與性齊終。法界無終。斯教何盡。况大慈願力護令法眼常存。盡眾生界皆蒙勝益。故賢首品云。彼諸大士威神力。法眼常全無缺減。又發心品云。我等諸佛護持此法。令未來世一切菩薩及諸眾生未曾聞者。皆悉得聞。然益有二。一令見聞成堅種。故出現品云。如人食少金剛。終竟不銷等。二令起行成證入。故出現又云。設有菩薩無量百千億那由他劫。序中文備。

乃至若聞此法信解隨順悟入當知此人生如來家乃至深入如來無量境界必須聞此始得生佛家入佛境故須說之令起行也。

疏略此十義故斯教興廣說因緣備於大疏。

鈔略此十義下第三總結指廣也標中應假爲問云何因緣故說大華嚴列十因畢答云略此十義故斯教興也是故總結言廣說因緣者有二意一於上十因中文句繁廣一一備陳故言廣也二於上十義外依大疏更有十緣故言廣也十緣者一依時二依處三依主四依三昧五依現相六依說

者七依聽者八依德本九依請人十依加者且初
依時者問此經第幾時教何時說耶答若以通說
謂念劫圓融豎無終始若別說者以無時之時略
有十重初唯一念謂一剎那中徧無盡處說無邊
法二盡七日謂佛初成道第二七日普徧時處說
此經法三徧三際謂前後際各無邊劫說無休息
四攝同類劫謂無邊劫中一一各攝無量同類劫
恆說此經五收異類劫謂一一劫各攝無邊異類
劫海如長劫攝短劫等常說此法六以念攝劫謂
於一念中卽攝如上無量前後同異劫海如是念

念盡前後際各攝諸劫常演此經七劫念重收此諸念所攝劫內亦有諸念復攝諸劫是則念念既其不盡劫劫亦復無窮因陀羅網重重無盡於如是時常說此經八異類界時如樹形等無邊異類世界時劫不同分齊各別盡彼時分常說此經九此彼相入卽彼異界所有時劫各別相收或互相攝若念若劫一一無盡常說斯經十以本收末如華藏界中以非劫爲劫劫卽非劫念等亦爾以時長短離分限故又時無別體依法上立法旣融通時亦隨爾於此時劫常說不息依上十時恆演此

經二依處者。問於何處說耶。答。總卽塵塵徧滿。橫該十方。若別從狹至寬。略顯十處。初此閻浮七處。九會說此經法。二周百億同類界等。謂盡此娑婆百億閻浮須彌山世界道樹王等。同時俱說。三徧異類樹形等刹異類世界。有不可說佛刹微塵等。一一流類皆徧十方。與前須彌山等互不相礙。各於其中轉茲法輪。四徧刹種。謂以十不可說佛刹微塵數世界爲一世界種。如是刹種。有不可說數。常於中說。五徧華藏。謂諸染界各皆相盡。唯是華藏數過微塵。塵塵皆徧法界。不相障礙。悉於其中。

演說斯經。六徧刹海。謂於華藏一一塵中皆攝無邊諸佛刹海。悉於其中說此經法。七徧前六類刹塵皆有同異刹於中常說。八盡虛空界容一一毛端之處。各有無邊刹海於其中說。九猶帝網。謂彼一一微塵既各攝此無盡刹海。卽此刹海等復有微塵。彼諸塵內復有刹海。是則塵塵既其不盡。刹刹亦復無窮。如因陀羅網重重不可說分量也。十餘佛同然。如此一佛說華嚴處如是不同。足顯十方一切餘佛皆各同然。經云。三世諸佛已說當說。今說。又云。不見有諸佛世界。彼諸如來不說此經。

當知餘佛無不同說也。此上十類一一各徧法界而前九正是遮那說法之處也。三依主者問說此經佛爲眞爲應爲一爲多。答通則圓融十身不分而徧。若別則二種十身。十重無礙。言二種十身者一唯約佛身自有十身。一菩提身。二願身。三化身。四力持身。五莊嚴身。六威勢身。七意生身。八福德身。九法身。十智身。二融三世間總有十身。一眾生身。二國土身。三業報身。四聲聞身。五緣覺身。六菩薩身。七如來身。八法身。九智身。十虛空身。是爲二種十身。言十無礙者。一用周無礙。二相徧無礙。三

寂用無礙。四依起無礙。五真應無礙。六分圓無礙。七因果無礙。八依正無礙。九潛入無礙。十圓通無礙。卽三身十身同一無礙。法界身雲。以此身雲徧前時處。常說華嚴四依三昧。問佛欲說經。皆入三昧。今說此經。依何三昧。答海印三昧。頓現萬機。何者。夫動靜唯物。聖豈然乎。示軌後徒。明將有說。必須靜鑑前理。承諸佛加。從定起而發言。言必真當。故受者之心自然篤矣。故於諸會多明入定爲說。經緣其所入定。皆盡法源。業用難思。五依現相。問凡欲說法。皆現瑞相。如說法華。光照東方等。今依

何相答。謂身刹容持光雲炳曜。何者。謂法性寂寥。雖無諸相。無相之相不礙繁興。起教多端。相非一準。或放光動刹。或華雨香雲。皆爲發起。故諸會之內。將欲說法。皆多先放光。通表智光。以被物故。六依說者。問如智度論說法總有五人。未審此經是誰人說耶。答該於萬類。觸物皆有表彰。所以然者。法無興廢。弘之由人。故經云佛法無人說。雖慧莫能了。今此能說通三世間。略唯有五。謂佛菩薩聲聞。眾生及器。廣則無量。法界品中類非一故。如僧祇隨好。卽是佛說。餘會多是菩薩說。法界品初有

聲聞說諸善友等多是菩薩說亦名眾生說菩提樹等卽器界說其能說人用法不同或用音聲或用妙色等皆能說人七依聽者問如諸會說法聽眾頗多今此會中其類如何答正在當機傍兼影響何者如子期云喪伯牙輟弦若無聽者終無有說卽下諸眾總有十類除當機眾餘皆是緣八依德本川有珠而不枯山有玉而增潤內無德本外豈能談然其德本略有二種一者智慧最爲上首二者勝行願力若感者善根若化主行願皆屬說因九依請人問諸會說經皆因人請世尊無問應

機而自說。今說此經。因誰人請。答以慈以悲。該於言念。若慈悲深厚。亦有無問自談。若敬法重人。要須誠請。後說初心。識昧未解。諮求上智。慈悲騰疑。啟請。然有二類。一者言請。二者念請。此經法會有無不定。十依加者。夫聖無常。應于剋誠。心冥至極。故得佛加。若佛自說。卽不俟加。如第九會。因人有說。要假上加。其第八會。依行法修。不異於前。又不入定。故無所加。餘皆具有。所以加者。欲顯諸佛同加。卽同說故。一說卽一切說故。亦顯果海無言。因相可說故。然施設不同。不應一準。加有二種。一

者顯加具於三業。二者冥加。但與智令說。唯普光法界無顯有冥。餘皆具二。顯必有冥。故具是因緣。

故此教興問。標云教起因緣。疏何略卻此十。

一音依時。

二者依處。三者依主。四依三昧。五依現相。六依說者。七依聽者。八依德本。九依請人。十依加者。答。

因緣之言有通有別。通言因是因由。緣是緣由。意不異也。如云因何說此大經。或云緣何說此大經。二言總得。雖因親緣。疏語勢同矣。故標云因緣。通以十義解釋。別者緣是資緣事緣。所以大疏先明十種由致。故說此大經。後明須假十種事緣資具。方可說經。今雖略此資緣。而前因緣不闕。言大疏。

者釋大經疏及新譯四十卷經之疏皆廣釋也
大方廣佛華嚴經普賢行願品別行疏鈔卷第三